

# Gaupasak

JUANJO OLASAGARRE

 **S** poesia  
**Susa**

Liburu honen salneurria: 3 € + BEZ.

Ordainketa egiteko, edo liburu gehiago eskuratzeko:

<http://susa-literatura.com/ebook>

© 1991 Juanjo Olasagarre

© edizio honena: Susa

cc-by-sa Creative Commons Aitortu Partekatu

<http://creativecommons.org/licenses/by-sa/3.0/deed.eu>

Lehen edizioa paperean: 1991ko azaroa

Edizio hau: 2011ko ekaina

Susa: 317 posta kutxa / 20800 Zarautz

Adoain Aita 92 / 31015 Iruñea

Zubitalde 21 / 48195 Larrabetzu

Telefonoa: 943 83 26 55

Elektroposta: [susalit@armiarma.com](mailto:susalit@armiarma.com)

Webgunea: <http://susa-literatura.com>

---

Hemen hor bezala  
zorientasuna inoiz ikusigabeko  
itzal iheskorra dun  
nonbait, ezaguna haizenez gero,  
guttunak izkiratzea debeku dun,  
arrazoia dun, bai, arrazioa dun  
zertarako izkiriatu, ezagunak bait gaitun  
baina badakin askotan ezagunenak  
arrotzenak, hurbilenak urrutien,  
itzal iheskorra izanen dun ere  
hor hemen bezala nia  
nia eta haustura, arraildura  
hor seguru hemen bezala  
odolak egiten din laster  
hor, nere barne exilioan seguru badela  
hau izkiriutzen duenaren antzekorik,  
nire izen berbera duen itzala, seguru badela,  
nahiz pastelak gustoko ez dituelako edo  
nire izaerarengandik apartatu.

# **ISPILUAREN AURREAN**

---

Hemen hor bezala  
zoriontasuna inoiz ikusigabeko  
itzal iheskorra dun  
nonbait, ezaguna haizenez gero,  
guttunak izkiratzea debeku dun,  
arrazoia dun, bai, arrazoia dun  
zertarako izkiriatu, ezagunak bait gaitun  
baina badakin askotan ezagunenak  
arrotzenak, hurbilenak urrutien,  
itzal iheskorra izanen dun ere  
hor hemen bezala nia  
nia eta haustura, arraildura  
hor seguru hemen bezala  
odolak egiten din laster  
hor, nere barne exilioan seguru badela  
hau izkiriutzen duenaren antzekorik,  
nire izen berbera duen itzala, seguru badela,  
nahiz pastelak gustoko ez dituelako edo  
nire izaerarengandik apartatu.

---

Ilunabarrak behera egitean zergatik jakiteke  
argiak bihotzaren leizeak arakatzean  
bada hiri itzali baten gisa  
kausituko ez dugunaren aurrementipena  
gure urrats berberak errepikatzen

Orduan da oroimena, zigarro hondakin itzalia  
orduen hausterrez ehundu oihalekin sortzen denean  
orduan batu ezinak direla sentrazio oro horiek  
orduan denbora mudapen ordeztu kolage hautsi  
orduan beste batek imajinatu keinuak

Hari zilarreztatu batek gurutzatzen du gorputza  
urruneko lurra ezagutu txori migrari bezala  
itzulera bestean paratuz oroimen berde horren  
sustrai loratza: fauna zeren berak  
oroitu oroitu egiten baitu bera ez balitz bezala

Ibai ertzean larrujo aldia  
bisaigeko gorputz hura musukatu zuena  
alkandora hura itzal istil aztarna eza

naizaren arrarokera  
landare urdin ortuaren sakonean

Kontuak ateratzen ditu iragandako arratsez  
emandako egunez bereganakoak behatuz  
paisaia guzti horiez bere bihotzez  
unatua arrotzak zaizkion bizipenez bizia  
hain zaio beste buruko bere buruari

Oroimena niaren hostroen sostengu  
hain da arraro gogoratze eza hau  
hain estraino arrama ebaki horiek  
bere burua errekonozitzea ezinezko zaio  
oroimena beti besterena denean.

---

Zurezkoa erran duzun hitz hori  
egun hauen arrama artean gogoratzeko  
noizbait gure Aurki aunitzak lorratzak  
izanen direnean  
akuarelatua paisaia hau non  
bizi gareneko garelakoaz antzesten baita  
eskena urtua urtasun aroan  
ainguratuz. Badira zeinu batzu  
denborarenak zitezkeenak  
finadura, esatebaterako edo istorio  
latz guzti horien gehiketa  
bada ulidura haragiaren borrheroa  
eta izerdia frutazko tanto batzutan  
bada gareneko xortasuna  
ametsetan kiribiltzen  
gauean hedatzen den doinua  
entzutez nazkaturik gauden  
kanta.



---

Zenbat izen ditu heriotzak  
arru maiztasunez egunak, udak  
uda udatuz, neguak hotza  
bihotzak bihotzetan  
pairamenaren uzta zorituz  
eta mirailak beste zu bat  
itzuliko dizu zure buruaren aurkezle  
galdutako guztiaren izkiriataile

Izanen dituzu akaso  
espazio bizigabeak, atzoak beti eta  
furingera iheskor hori denbora  
denbora dena aztiatua, lehaio, zu bera  
goizaldetik milaka formatotan  
aurkeztua.

---

Inularrean ene izenaz ahanzten naiz  
goroldioaren mirabe ur nabigagarrietan  
hil-urren bezala desbizitu eguna  
estrata beilegiaren amiltze leuna  
inularrean ahanzten naiz eta itzuli  
antigualdean naizen honetatik erori

Kulunkan pausatu, paper ortze infinitoak umotu  
ene izenaz ahantzi eta pausatu  
salaren freskuran  
ene burua itzala legez arnastuz  
izkiriitzen naiz

Inularrean ahantzi perbersioak onduz  
izkiriatu nahi naiz, puntu hegirak  
puntu etoiak ume hordiaren habiak  
desio urtuak langar mintza mixaren desio

Inularrean ene izenaz ahantzi eta desbizitu  
hil-urren bezala goroldioa ehundu  
Inularrean.

---

Nola trenea estazioetan sartzen den  
hala sartzen dira estazioak gudan  
maleta bezala eroan ohi gara  
eta Nira heldutakoan  
pertzatit zintzilik beha dugu  
nola bilduko garen eta joanen  
beste estazio berri baten bila.

**JANTZIAK ETA HATUAK**

---

**B**eranduago dira beranduago  
inoizko ele triste hori horiek  
kairolez eraikiak, arrangura hotzak  
erahil arrats kausigaitzak nonbait

desioa gero uncertain-a apika iragan baina inoiz ez  
gertakizun dena, inoiz ez  
ihesa atearen bestaldean gordetako  
errainuaren lekuko, ideia itsasoa

hemena eta orainaren salatari mina  
iragan ororen hondamendi umoa  
inguruaren perzepzio arkerak  
ankerra bere frintza orotan

takigrafo sustraigabeak akaso  
auzitegi horma beltzetan  
gertatutako heriotzak baino  
hobe darrai edertasunaren aztarna

garaiak, garaiak non heriotz ttipiak

poema abailetan urtzen baitira  
non edertasuna zaramaren apopilo den  
eta legez kanpo beti.

---

Euri eza eta bizi-arazoak direla medio  
sentimendu demografiak  
urrikuntza ikaragarria hartu du  
atxiloketa ugariak  
gauez gau  
nekez heltzen dira  
egun lanbrotsutako zirraren  
espetxe guttunak  
noizbehinka lerro hits batzu  
uhuri gargail gisa  
isiltasuna gero  
errefuxiapenak urrutiko herrietara  
—perzepzio bestelakoen erresuma ilaun—  
estradizio uholdeak  
heriotz zigor akitzen dira  
gure burua maite duguneko jats beltza esaterako  
hilobi amankomunean datza  
hira lits urgunekin batera  
desioa gau-haginetan  
itzultzen da doi  
ihes egiteko berehala

atzipe ez dezaten  
proteina dugun hogena  
zokorik ilunenetan gorde behar izan da  
azken heroi bezala  
ekintza suizidetara behartua dago  
euri eza eta  
bizi-arazoak direla medio  
sentimendu demografiak  
urrikuntza ikaragarria hartu du  
lurralde okupatuan bizi  
lurralde okupatua izan.



---

**B**adirudi haize erauntsiak datozela  
halere euriaren esperoan  
da negua

«Demokrazia garaile Ekialdeko herrietan  
erresistentziaren estatuak hiltzear direla eta  
edozein gauza gerta daiteke hurrengo egunetan  
oraindik ez dator denok espero duguna»  
esan du irratiak

Egoneza beilegia hedatzen da belatze hezeetan  
zehar

atezuan egoneza hirira noiz sortuko zain  
uholdeka hitz gutxi batzu eta  
seguru jakiten ez denaren xerka  
egunen erronkak arlauzak utziz gure baitan  
(ez gara gure baitakoak  
du erran bihotzen mugalariak)

Biharko aurrentipenak sortu nekea  
normaltasunak jaun eta jabe

errotu baita  
nola joan den zerbait egun  
hala bihar  
ezpata bezalako  
«zergatik» berri bat landatuz

Ilbeltza gaua 1990  
zerbait joan deneko lorratza  
aterik gabeko giltza bezala  
(ate ostean atea  
bihotzen mugalariak erran du)

Eta zerbait positibo hausnartzearen  
perbersioak ditugu  
txukarrez beteriko hautsontzi batzu  
bizi dugunaren seinale  
gorputz bat  
abailago  
maizago ukatzen zaiguna eta  
iragan delako esate hori  
iazko errenta aitordpena bezala

---

Errealitatea idatz makina zahar  
non batzutan lili bakarra den  
izan zen «doble-wind» ama  
ume laborrien garunak mendren

Izan zen biziaren jaiotza eta abortoa  
nekeduraren ilunabar harildua  
ohantze fantasmalen mitoa  
itsas suen jela geruza

Zekartzan intziriaren atabala  
gertakizunen ur laratza  
haritan hordi keinua bezala

Mamu eta aingeru izan zen  
errealitatea «doble-wind» ama  
non lipar ilauna desden

---

Saldu genuen saldu  
etxea ganadoa lurra gure lurra  
saldu  
jende saldo saldua gara besterik ez  
paradisoa ez zela gure bihotzen  
biztanle bagenekien  
begenuen lurra gurea  
seinaletzat kantuak dantza  
leiendak ipuiak  
herri oro bezala  
existitzen ginelako datu bilketa  
historiaren seme egin gintuzten arte  
eginkizunaz tratatu eginez  
izateko izateaz ohartu beharraz  
herri honek azpikoz kanpora egin zion bihotzei  
etxea estrematu zuen  
liburuetan bilatu  
ahaztu bizitzez  
eguraldiari lurrari bezala adarrak belztean zen  
urratsa erabakiorra zenean  
huts bakarra fatala

zugaitzak haltza makala haritzak  
heroiak gure Gu  
piztiak otsoa hartza jela  
txepetxak  
paperezko tigreak  
amaitzear zen bale leinuak  
goroldioak iraganak denborak  
magalean hartu gintuen paisaiak  
gizonak emakumeak abarrak  
erru soleileak  
bihotzez egin zuten sala  
ispilu non begiratu  
zertan zen herri hau... Urtua  
ipar leinukoa ote zen  
datorren udaberriko jaiotzak leinukoak ote?  
bizitza ez zen nahiko  
erantzunak behar  
ehun metro korritu ondoren hildakoak  
zein desertutara egin zuen bidaia?  
eskizofrenia herri honek asmatu eritasuna ote?  
non paratzen zituzten dinamitatzailleek bonbak  
bere bihotzetan edo  
mugetan, harandiko lurraldeetan?

Eta akaso kitto ote: hemengoa naiz  
bihar bero egin du  
dena da berde

Saldu genuen saldu  
saldu etxea ganadoa lurra gure lurra  
abiatu ginen  
nola indio amerikarrak erreserbarantz  
eskutsik hotzez ilun  
gure buruen bila  
laparrez lapar, bihotzez bihotz  
umeak besoetan, zaharrak herren  
manukor permadura, senak ibai  
arrats geldiaren so pean  
jakinaren gainean izanik  
uherra zela aurkigai  
epopeia patuaren pasioz paradisu zitzaigula, bide  
arauen arabera hilotzak sortuz  
traizioak deserzioak heroiak  
guda eta izurriteak  
sua bikoiztasunez hormatua  
noizbait izanaren eternitatean  
gero laberintatuak

Eta bideak zugaitz harrituak landatu zituen  
pertsonek bezala  
biziaren zama gisa bidaiatu paketeak  
beste bide batzu eta itzuli nahi zutenak  
eroritakoan inoiz ez jaso arrenkurak  
halaberrez saltzaileak  
haiek: zaharrak  
eta haien ondorengoak: ehortzaileak  
bidaiaren pasioz gure bihotz aldatuak  
iparraldea zuten amets  
han nonbait utzi genuen etxea  
baina jada ez genuen etxerik  
saldua zen

Geroztik ipar leinuen bihotz ttipietan  
izaki saldu bat dago  
geroztik ipar leinuen bihotz ttipietan  
saltzaile batekin lehian

---

Etorri da negua dio azken euskaldun aratzak  
baserria herria elurra hotza pentsatzen du  
bero beharra epelago norbaiten besoetan eta  
ahitu zaizkio mistoak, agortu bere buruaren  
konpainia  
haizeak hutsa dakar gauaren ateetan hoska

Ahitu zaizkio mistoak, agortu konpainia  
larunbata, hotza sukaldean, otordua gertatu  
ganadua gobernatu, tristeziari eutsi, pentsua eman  
bizia du etsaia ez du inoiz ezagutu Joanes Artzaia  
baserria hotza larunbata gaua herrian jaia

Argi gorriko etxea putak gin-kasak  
mutil zaharrak ate joka damuak gerorako utziz  
beso batzuen bila Fatima beltzarana arana  
emakume ederra xarmanta ezagutu bakarra  
«kondonik gabe hamar bortz bestela»

Leitu du kartel handia «Egiozu ihes HIES-ari»  
ezezaguna zitzaiona ikasi du leitzen eri



da gaixo hilen naiz dio azken euskaldun aratzak  
ez dut merezi dio bitan egindakoagatik paga  
ez dut merezi isten dira aldabak

Unatua da eri baditu narruan ubeldurak ozkotzak  
etorri da negua azkenez ganadoa gobernatu  
pentsua eman tristeziari eutsi su egin  
azken baserriari heldu, azken negarra ixuri  
ganadoa gobernatu, azkenean, Azkenaren zai  
datza azken euskaldun aratza  
azkenik!

---

**P**resoak gartzelan dirau  
eta egin daiteke poema arrosa  
esaterako  
«gure herriaren bihotza preso dago  
ez da negar garaia, borroka garaia baino  
arratsero norbaitek negar dagi  
ama anaia arreba seme alaba senargai lagun  
arratsero norbaitek zerratuaren seme-ametsak  
hariltzen ditu»

Eta egin daiteke poema surrealista  
«arratsero bihotz akutxilatuei semen eta hilerokoa  
hormatzen zaie burni hotzaren etorbideetan  
arratsero norbait hiltzen da  
ama anaia arreba seme alaba senargai lagun  
arratsero pentsamenduari zaizkio  
usteltzen hegalak»

Eta interpreta daitezke biziak metaforetan  
zerratua egun iluna arrats eza  
desolamenduaren desolamendu zeldaren zeldan.

---

Inularrean

paisaian figura batek goazenean  
makalak transmigratzen du tristezia.

Orena da, Desiok

pizti iheskor gisa egiten du jauzi  
arratsaren espazio laranjara.

Edozein herrik gugan datzanak esatebaterako  
atzipez dezake lokarri berdeskez  
airera garen errainu ilun hori.

Beiraduraren geldotasunean bada  
txirrinka hautsi zaiolako  
negar dagien umea.

Eta hogeigarren mende amaiera honetan  
gartzelan dagoenarekiko oroitzapen ilauna  
orain da paisaia porlana den unea.

---

Emakume bakartiak tristura transparentatzen dute  
dolu soinekoz  
paseiatzen dira arratsaldean beren gizon  
hilenganako desioz  
amets ankerra bizi izan zuten paseo bakartiak  
geratzen zaizkie soilik  
eta oroitzapen idealizatu bat maite izan zuten hartaz

Izan ziren bortxatuak izan ziren irainduak izan ez  
ziren  
esan zieten hura prometatu... arratsaldeetan negar  
dagite negar  
ukan zezaketen herra ukatua zaie ezin dute maitatu  
herra  
ez zuten ikasi eta gaur azken eguna espero dute  
oroitzapen apurrak janez  
sexoaz ez dira mintzo ez zuten ikasi bizia beste zen

Eta etzaten dira pirula antinerbioz  
plazerra bere iloba ez jaiotan kausitzen zer egin  
duten gaizki

galdezka Jaungoikoak zergatik zigortu ...atrebenzia  
ez bada

eta bazkaria prestatu ohi dute maitekiro  
ezinorentzat

egunen amildura leuna iragaiten beha

Beren soinetan munduko marabilarik handiena  
gordetzen da esan zieten

hamar-hamabost urte zituztela gorri gorria zenean  
egun hura

beha dute zimurra nardaz aintzina ukan zuten soin  
hori

jada ez dena haragi puska bat baizik

haltzak aspaldian isildu ziren ez dira gerri eta  
giharrez mintzo

gizon hilak soinetan dautza betirako lore edo laban  
gisa

eta doluan transparentatzen da bakarkidea arratsari  
dirdir

ez

hiltzen ere ez zuten ikasi.

# **DESIOAREN BIDEAK**

---

Baina hain da luzea bidaia hain nekeza mortuan  
zehir trabesia hau  
aeio esan genion hainbeste gauzari hainbeste soin  
hil gibelean utzi  
ezkietan soin guzti hauek zintzilik sorterra umel  
hartan  
nobody knows where... ikasi genuen esaten ortze  
halabeharrez gorriei

Muga bat edozein muga espero dugu urrun jabal  
honetan  
baina hain da luzea bidaia hain nekeza mortuan  
zehir trabesia hau  
eki frintza bakoitzean trasaldatzen zaigu paradisia  
desioz harantza  
kanta ohi dugu likido amiotikoen igarleak noiz  
sortuko zai

Zein mentekatua gure Moises berez Moises oro  
mentekatu  
halaber jaungoikoa mentekatu aginduz agindu sutan

mentekatuenak gu herri aukeratua ustez nobody  
knows jaunaren...

dugu ilunabar oro gareneko mana jan ohi

Azken kanpamendua nonbait balitz sikiera  
kanpaina dendak gure narruz josiagatik  
jaungoikoaren beharra pairatuko genuke  
aisa aisago bederen manualetan letorke bizia nola  
den

Baina hain da luzea bidaia hain nekeza mortuan  
zegar trabesia hau  
gamelurik gabe dunaz duna erratze astuna  
erraiak urratzen dituen haize sargoritsu hau soineko  
legea bezalako aho-lehorte hau heriotz itsaso baso.



---

**Z**e ez bait zekien denborak urrats  
deslai guzti horiek ekarriko zizkionik errauts  
herratsuz laburbilduz bizia.

Aztarna:

trenaren ulua urruntasunean hitzez zamatua  
denbora zingira uherretan gordetzen  
Iraultza hitzaren indar balaztatua  
Sozialismo hitzaren tolesdurak  
pasiogeko bizi honetan uzkeldurik  
ETA konjuzio kopulatiboaren itxura aldaketa  
ETA kausala eta orain  
kasuala nola den kasuala  
erabat naifa diote  
desioak pasioa persekutatzea  
erabat anakronikoak diote  
pasioaren bide aunitzak

Eki arrenkuratsua berandutzen da agindutan  
urrats berdeak arrats gabe leher daitezke  
eta jitoa bandera ona da mendreen

igual da ze inporta du  
ez da inoiz garaitza hain hutsala izan

Horregatik eta bizia temati delakotz  
kausalitateaz eta zenbait hitzen esanahia erkinez  
lehiatzen da

horregatik marrazten dute urratsek  
desioaren bidea goizalde beti zambrotsutan  
horregatik zaio bihotza beti trena beti  
iparralderantz abiatzen.

---

Dio:

Ez dut ele gehiago erranen zure izenaren izenean  
ez dut elurraren errai lizuna zurekin bisitatuko  
ez zaitut ikusiko inoiz kez landutako landetan barna  
ez dut zureganako perbersioen xendetan irri eginen  
zure ipurmasailetan izkutatu galderak  
erantzun bila zetozen  
(desioa beste falo batez naharo)  
nontu zinen errealitatea eginik ezerezaren antzeko  
mundu soraio batenganako grinez  
atetua iraduaren aterbeetan  
(eskapoa galderaren aurrean)

---

Igandako urteez ahurretan ezer gutxi  
haize-lorrazak bailiren oroimen itsu batzu  
nabarmentzeko hitsegi, gogoratzeko lain ez  
motor abarrotsa bezalako, errime,  
erreka hutsen amiltze barrunbe bat  
egun oro hamabietan ohera aurretik  
desaditu behar dena  
erromantizismo desitxuratu hau ipuinekoa  
bailitzan egite trajikoenak maitatzera  
haramana, mitomaniarako joera hori  
hain farregarria batzutan  
(antigualdean hil huen Etchaun  
eta inzestoaren aroa iragana duk)  
autokupida estatua umel hori, hire  
hirugarren itzala  
ez diat pairatzen  
pisu paratzen haiz hireaz  
mintza eta mintza  
badituk  
urrearen dizdirak higan  
hire buruaz, esatebaterako

gozo trufatzeko paradan  
gustoko haut, maitatuen  
halere  
isilik hagoenean.

---

Nik egin nezake kantu ilun bat  
sol sostenidoz ezein arratsaldetan  
zuhaitzak basoan lainoak ernetzen dituela

Nik esan nezake non galdu  
zen azken aztarna, zeri segi  
okasiorako moldatu moldeetan

Nik jo dezaket ekintzara  
bizi bakartira apartatu esaterako  
sentimenduen lurraldea bentzutu ondoren

Ni egon naiteke xor  
artean negu gorriaren kabinatik  
salbaziorako hots egiten didaten bitartean

Nik ahoska dezaket  
jabal zaitez, konponduko da dena  
eta estazioen anonimotasuna balakatu

Nik egin nezake malko  
arratsaldea erreketan iragaiten beha  
lasai lasai konponduko da dena

Baina zuk, zuk diozu  
gure historiaren seme gara  
berandu da  
euri zara.

---

Gal nazazu  
eraman zuhaitza haizera transparentatzen denera  
eraman

gal nazazu  
etzan han non haizeen-zuhaitza jasotzen den  
hauts horia  
mugitzen

gal nazazu  
argitu han non hauts horiak hegan egiten duen  
lurrealde bihoztu  
hartara

gal nazazu  
taupadatu han non lurrealde bihoztuak  
exiliatuak dituen  
hartzen

gal...  
gal gaitzen  
han non zuhaitzak ur bihurtzen diren.



---

Lagunak izandu ginonen

DENBORA: iragana

PERTSONAK: gu (hi ta biok)

ASPEKTOA: burutua, ekintza amaitutzat jotzen  
denekoa, alegia

badakin ez dun inoiz izan laguntasuna bat bakarreko  
kontua

nahiz, bide batez, gure burua gutxi maite dugula  
esan behar

beraz, bi gutxienez, arerio izateko ere

ZERGATIA: bizian gerta ohi den moduan... iragaitea,  
ekanduaren gandua edo beste izenez: nekea

kriseiluak ilunbeta hertsian bezala

maitasun kontuak itzaltzen ditun gehien

LAGUN: izena: ongi ez dakiguna ordezkutzen duena  
letra ttipiz: euriak bustitzen gaitu

ttipiagoz: maitasunak jan

are ttipiagoaz: gure buruak islada iheskorrak

ikustezinez: hilkutzak ohantzeak

-AK: aniztasuna adierazteko atzizkia: gu (hi ta ni)

IZAN: nia: eromenaren arraildura anitzean errotua  
beharrean

izan... gero: ni, zu, nirea, autoa,  
etxea, emaztea, semealabak, izan... gibelean:  
heriotzak

GINONEN: adizki laguntzailea esan bait dinat  
badakin ez dun inoiz laguntasuna bakarreko...  
gero: oroimena:

Lagunak izandu ginonen

---

Ezta ele bakar bat ere laztana  
hauts bait daiteke enigma kuttuna  
ez zaitez mintza, ez mugitu maitea  
errekonoziti ez zaitzan ene ispiluan errainu

Iraun ezazu laztan honetan laztana  
sorbeltzak errozpean zinkuru kuttuna  
kale arnasa, egurats ozena maitea  
urrun mugaz harantza ene bihotzeko bihotz

Ez nazazu begira laztana  
apika izutuko nauzu kuttuna  
ohar zaitez aienak nahi gaituela maitea  
eta gaueko espektro bilakatu ene paduko padu

Ezta ele bakar bat ere laztana  
hauts bait daiteke enigma kuttuna  
ez zaitez mintza, ez mugitu maitea  
maitasunak eho nahi gaitu ene errotako erroi.

---

Gaurko musuak atzoko oroitzapen  
oroitzapen bihar gaurko musuak  
eraztun zirkulu zinkurua  
soin leinuru xumea txingar moreko zuzia

Hura itsaso emaroa dirdai urreztatuan  
ekuru isiltasun mina itzal  
batzu maitatzen marmarrez esate hura  
gaurko leinurua oroitzapen higatua bihar

Ikutu zehatza soin gainean  
zilar ehun urradura bezala  
tropoiluan zabalezinezko desio hura  
gaur maindire aizuna atzo desio gezala

Arrenkura ibaiak plazer huistenganako  
kurrikak lako eskuak  
mugimendu itoak ebasten  
ilunbeta ihesak atzo gaurko kurrikak

Abiapuntu eternal ekintza  
oroitzapen bihar gaurko musuak  
gaurko leinuruak ilunbetak atzo  
desio atzo gaur maindire higatua

Gaurko kurrikak ilunbeta hezeak bihar  
abiapuntu eternal abiapuntu atzo  
abiapuntu bihar abiapuntu eternal  
ikutu zehatza. Zehatza.

**DESIOAK**

---

Erran nizun

Espero zaitut behelainoak zauritu arratsaldeetan  
abiatzean zure bihotzak beti iparralderantz egingen  
du ihes

ehiza sahierra eta ehiza fierra  
ehiza denborak persekutatuak  
negar egingen dizut noizbehinka  
eta paseiatuko igandeetan

Eta gaineratu  
ez dugu betarik  
kasuala da aurkikuntza oro  
egunak goizak uneak eta sagarrak  
beti zara xerloago hurrinean  
eta apirilean ez dugu betarik  
errepikatu nizun  
negar egingen dizut gaur  
desioak hesitu bide hastanduetan  
egunerokoaren jitoan jitoa  
gaur oroimena eta desioa  
nauzulakotz gaur

Eta eman nizun eskua  
eta ferekatu  
desioa beti da errainu.



---

Udaberri erreez mintzo ziren  
karezko egun haiek erditu zuhaitzez  
estaltzen zenagatik minduak  
txori migrarien zentzuaz itauntzen  
lirain zen eta berandu arratsak izekitzean manerak  
arbola zuten erretratu  
han  
desioak izena duen gartzelan

---

Udak etxe egin zuen bihotzetan  
asko kostata ez pentsa  
etxeen arazoa bihotzena bezala  
larria da eta, aurkitu zuen azkenean  
etxeño ttipi bat bi gela komunik gabe enea  
arreska guztiaren artean

Eskegi zituen balkoian koloreko kamiseta  
tirantedunak  
bakero estuak desioaren seinale  
haragia gizon ehizaren apeu  
laru beltzaran guzti hori paradisuaren ordezeko

Ah! eta zerbezazko gau-hamaka zabalduz  
solasaldi arinetan zen permatu beirazko  
hondakin berdeak, Heineken, hautsi aurretik  
auresenti zitekeen ez zuela luze joko

Goizaldera akaso zortea eta hori dena...  
norbaitekin larru jotzeko parada eta hitz liketsak  
ahoskatu: «Eguna fruitu umoa da jateko prest»

eta agurra mentazko karamelua edo pena  
apur bat mikatza banandu aurretik

Gero jertseiak etorri ziren, kazadorak  
eta zer moduz oporretan? non izan zara?  
argi zegoen akabatzera zihoan  
udako azken bidaia Iparraldera

Eta alokairuen igoera zela eta  
zirt zart populatu zigun bihotza  
baimena gabe ustekabean  
gero eta luzeagoa den paralisiak.

---

Denborak enbor ustelak utzi zituen  
azal zimur batzu eta su itzaliak  
etxearen aurrentipen izua dilindan  
esaldi erabakiorrak biziaren erranairu

Padura harridura disekatuez biztanletua  
izen batzu harri lako oroimenak  
xerka eskuz esku iziotua  
eta ahulezi errimea euria datorrenean

Zirrarak koilare luze gisa  
zuhaitz hilak perzepzio bila  
mugalari xendeen etorrerak  
berririk gabe euriaren zai

Enigma entendiezinak soak bezala  
hagin soil batzu belarren islada  
egun berri batzu kez zamatuak  
eta desio erreka agortuak.

---

Gorputzaren iladak ortzemugan  
galtzen dira, hirurogeitamar ele  
ahul ezetz erratea bezala  
soin bat gihar batzu nola  
interpreta daiteke desioa: biokimika erranen da  
gauzen adierazleak, marmar batetan  
konfidentzialki arrazoi bilatzaileak  
bitartean iragaiten dira lorratzak utziz  
biziak  
marratzuz betirako desioaren amildegiak.

---

**B**eltzaren semea da, elurgorriaren kumea urrats  
erraldoienganako pasioz

untzaren anaia da eta untza bezala itsatsirik bizi  
goizalde

ozpindu honetan  
ekiaren destainaz

Transformer iaioa da ikasi du zintzoki noiz izan ibai  
ertzeko makal

noiz sala aurreko intxaurrondo iguriki

Kontradikzio horia da eremu deslanienean erreinu  
anker

batez marraztuz  
sasoién babesá

Baina beste zerbait agindu zioten dena

Esaterako: zorientasunaren bateran zitekeela  
edo arratsarekin bat ez lukeela etzan behar  
halabeharrez

edo izenen izenak ez zituztela kontutan  
hartuko

edo oihan kordokatuaren pareko zitekeela

Baina nola inezturak arbola kixkurtu hala gaituzte  
soildu  
bizitzaren  
bira amaitezinak

Eta gaur oroimenaz beste zenbaki lerratu bat da  
bere izenaren hautematea arrotza zaio  
nola arrotza sahatsaren lengoaia ezkutua  
erabat  
desenfrenatua  
belarrietarako

Desioaren jeringiletan arraildutako hauts  
naharoetan  
barrena bidaiatzen da  
badaezpada ikurrak lorraztuz badaezpada  
paranoiaren erresuma estuko bide xidor  
lizartsuan  
Badaramatza egun franko eutanasia trenka dezaten  
txostenak idazten

Egunak zigarroen ke hutsez elika daitezkeen  
baieztapenez bete

ditu psikologi trataktusen margina oro  
nola euriak oihanetako hostroen  
larrua  
malkoz

Jakin du guttunen poderioa postarien zorroenganako  
eta motorrena gizonenganako  
Espero du taxiak sahatian espero bezala  
Biziaren kerua etorriko delakoan edo  
Espero du kristalak hausteko  
Pasioaren eldarnioak irakas diezaion  
non utzi zuen soina.



---

«Destinu guztiak»  
garrasi txartelak  
autoak ezker egin zuen

«Destinu guztiak»  
itsasoak hots  
horma urtuaren zaporez  
gero gorritz erein zen lurra  
muskerra galtzean.

Jats beltzeko eraikuntzak  
gordetzen zitueneko infinitoak  
haruntzago beste bat.

«Destinu guztiak»  
plastikozko patuz, egoneza  
ozeanoak mareetan maiz  
pasio zurak jitoan

«Destinu guztiak»  
lau haizetara  
arnas lainotua kristalean.

---

«*maitasuna dirudit amets gorubetan*»

Lauaxeta

**M**aitasuna dirudit amets gorubetan, gorubak urrun  
hariak langar, desio estatua uluak  
ur gauak durundan urrats ilaunetako higitar  
ur jabal ilunen erasiak liparren erranairu

Noiz nontu zen desioa azken aldiz?  
bere hobiz arrenkurak poseditu marmarra  
zer etor daiteke ele uzta naharoa ez bada  
zer ur zirrikituen amiltze oztina baino?

Farola legez ur estatuak birika erraldoietan  
lasterka izenetan zehar itsasoa eztul hezez  
erle zizta bihotz mortuengan amodioa  
jelatzen ezkidi bezalako abenidetan

Noiz galdu zen desioaren aztarna labaina?  
itaun daiteke sukarrak erre gaituen  
eraso beilegi horiek etzan dute ezkidirik  
ala bakarrik laztan trukez laztan da?

---

Pasioaz joana dela erran daiteke soilik  
ebasle atzipetuak bezala laban eroria  
eta arrakala

Metafora laruz gorputzak mintzo  
desioak dago eriro hatzaparretan bihotza  
begietan dizdira

Haragiak dirau oraindik arrenkura zirkuluetan  
esperma tantoz eta badakar nasai hagineta  
berunak  
jelatua hegala

Odol sari maitaleari eta antsia keinua erren  
desio: herio dio ilargiak  
plazer egoista botaka

Halabeharrezko omen bizitzea  
neke eternala ikumenaren tolesturetan  
hontzaren itzala

Begi-etorbide kimatutan b(l)us bat  
sol-sol-la-s pentagrama  
gorputz mutuen xerkan doana.

---

Arratsalde iraduen aroan  
kantoietan farra egiten zenean  
jakin eta eskura ezinagatik  
hautsaren antzo zergatiak  
izenen motots farafailetan  
zergatik ahantziak, galduak  
egunerokotasunaren arean  
garrasi dagite objektuak

norbaitek norbait du espero  
akura-plazerra  
enkontru etsia akura-plazerra

Hedatua gorputzetan galduraren guttuna  
edadearen etiketa fosforitoetan hautsa padura  
haragiaren zaurietan biktimak  
zergatik gabeko zergatiak  
bihotz transaldatuak

norbaitek norbait du espero  
akura-plazerra  
enkontru etsia akura-plazerra.

# LARRUAK

---

**A**lkobak musika lizuna egiten du arnas  
ur musika desioa  
amiltzen da izaren bide sekretuetan  
ahuen, ele, arrenkurak izerdi kolpeka  
eskuak hegan mingaina bide begiak mingain  
bularra ilunbeta paisaietan luzatzen  
ahoak urrunean dira galtzen.  
infinito gosez bizi den estatua den desioa  
larru arrasean igerika  
ukimenaren erresuma orainaren  
manera bakarra.

---

*Jaime Siles-i erantzunez*

Larrujo ilargiak laztandu larretan

Larrujo estazio umel apatridetan

Larrujo gihar ilun karriketan

Larrujo inoren begi berdeetan

Larrujo ilusio lako akura soinez

Larrujo barneraino gaua idoro

Larrujo maitalea hilgale grinez

Larrujo sekretu hezeak igurtziz emaro

Larrujo kontra natura

Larrujo ero moduan bizi xerkaz

Larrujo spermaz bustiz tristura

Larrujo zauri zurien erasiz

Larrujo musu eternalez

Larrujo gizon gosetien galgura gaziz.



---

Hiriak negutu zuen  
hondar bazterretan homosexualak  
begirada kolpez mintzaten  
elkar terziopelo elez putek  
arrastaka zeramaten urtetako  
nekedura  
txakurrek jabe deslailak  
bilatzen zituzten  
arnas eri garaia  
azken autoak goragale azkena  
ekarri zuen plastiko eta  
gasolina usainez, bafle batek  
izenak erran zituen  
bere buruak kokatzearren batez ere  
birao egin zuen norbaitek  
munduaren kontra  
iragan ziren modernoak  
zelofan lurrinez inguraturik  
far karkaila entzun zen  
han hurrinean  
egunaren argi salatariak hautsi zuten

ilunbeten arlasa  
galipo gainean  
kondoi bat datza

---

Zure ametsetan izkutatu  
lur erlastuaren usaina  
bi igali bi  
bularraren muga marrazten  
parez pare  
ortzemuga beltzaranen otoi  
eta ahoa plazer debekatuen jantzi  
limista, sama eta arraso

Jakin zure adatsean  
haitzuloengan gorde  
iratxo perbersoak bailiren  
ferekak ernetzen direla  
eskua itzela eskua urrundu  
jakin bisitariak opari ainubeena  
jasoko duela

Eta bai ote erran zenidana  
zelula oro plazerrerako  
dela negu dela uda

zure eraikuntzak likido  
preziatuen zordun  
bai ote

Utz nazazu bisita zaitzan  
arrasta ditzan zure bideak  
pasioaren urrats sahierrez  
haragizko segundutan  
oren erreez.

---

Hatoz zugandiko hoberena leituko dizut  
Hatoz utz nazazu mahaiaren ilunbeta freskuan min  
egiten  
Hatoz berandu da eta badut nigan ura irakiten  
erretzeko  
Hatoz izan gaitezen bat elgar ditzagun ezpatak  
Hatoz jo zaitzan  
Hatoz zure estolda ilunetan bisitari izan nadin  
Hatoz hezurak erreko dizkizut eta zure gorputzeko  
debekatuena  
Hatoz desioaren izen bakarra zu  
Hatoz hitz lizunak erranez xalo xume xuabe  
Hatoz ene bularraren harri tailatuak ferekatuko  
zaitu  
Hatoz nigandik ateratzeko izaki more bat  
Hatoz esne uharretan igeri eginen duzu  
Hatoz hatoz hatoz  
Hatoz berandu da  
Hatoz minaren plazerra absolutoa da  
Hatoz bestela apika  
zaharregi  
gara  
izanen.

---

Zure sexoak  
eraikia non domeinu infinitoen  
desioa ospela den  
udazken kantaren doinua du

Orbela buruan ipurdi inguruko pagoek  
biluztura egunsentia da

Zure haragizko munduan mugitzen zarenean  
desioz zamatu gurdiak gorputzaren bideak  
zeharkatzen

Udaz eskuan soilik idatzitakoa  
lur aisetua bezala zure haragiaren tolesdurak  
bilduak udaberriaren zai

Egunsentia da eta  
desio zaitut  
ostera.

---

Gauetan hantutzen zaizun  
poema beltz more horrek  
nik ezagutu idazmolde  
ederrenak ditu  
ez du inoiz poema batek  
zure gorputzaren musikalitatea  
erdietsiko

Enegan idatzi Z orok  
zure izterren basoan A  
du paratua gogoa.

amoltsu arakatuko dizut arima  
eta baraez beztitua bazkaldu bi habiak  
eta desioaren desioz  
erroitza erlastuko eme  
ferekaz fereka frintzatuko  
zure gorputz gotorra gargailatu arte  
izanen gara haguna, hatu gabe hegan  
aurkituko ditut zure istil, izaro, intziriak  
jabal jabalak

kisuaren kerako kaduria kimatuz  
liho leun loa  
menturaturik marea—  
nenufarengan  
otso odoltsuaren gisa ohostuko  
pipilaren perfumea  
ene soineko egiteko  
eta titiak tantai  
uhuri uzta dute ukanen  
xendaren xerka abiatuko naiz  
zantzoak zuzen zutuz zanbrotuko dizut zakila.



---

Perspektiba leuna da  
mihisa meheak oro estaltzen duela  
odolaren jario isila bezain  
emea begiratua: iragana

Bular sendar guzti haien dizdira urruna ulua  
desioaren setioan gauean bilaka parkean  
(eszenatoki berbera)  
slip multikoloreen laburpena desio hantua

Gaur edozein hiritako parke honetan  
irudien iragaite hastandua  
begiradaz begirada irristatzen da desioa  
hankartean galtzen  
beranduegitan itzultzen  
pasioa zurezko da  
urriko gauetze honetan.

---

Motza da estaltzen zaituen ehuna  
granatea soinarene zabaltasunean  
bustia marrazten duen muinoa  
itsasoko duna  
eta tenplu bateko kolumnak hankak  
basoz populatuak ur beltzez  
zeharkatuak tantak  
zure anguluetan  
hain da motza estaltzen zaituen ehuna  
ezinezkoa asmatzea izkutatzen dituen munduak  
granatea eta haragia  
hondarraren galgatan.

---

Hain zara plastikozko  
horaila platino beirazko bezala hauskorra  
metakrilatozko begiak kliskan  
modernitatearen irudi eta baso umoa  
zugandiko naturaltasun aurrefabrikatua, xerloa  
altzairu bularra irlatzen nauena  
ukimen beroez titi buruak, arreak  
zurezkoak eta ixterrak  
etorkizunak gordetzen dizkigun  
fruitu arraroen formaz  
zirkuito, kable  
elektrika-odola  
dizdir argitsua  
ipurtargi fosforeszentea zure sexoa.

---

Iragan hintzen une abrea  
zer esan burua galdu nuela  
higanako aseminez asea  
ilargiak ere higalea

Iragan hintzen desioaren desio  
zein amets kotoizko mutil gaztea  
aran urrun, baso umo, perbersio  
odoltsuaren soin errimea

Iragan hintzen milaka hasperen  
hire bularraren errainu hotza  
ene hitzalaren urradura moreen

Hintzen iragan haize landan  
iragan hintzen desesperoa dantzan  
iragan hintzen hintzen iragan.

**GOIZALDEAN**

---

Bere begien osin agorrenan abenidak zinkuru  
langarrak eraiki tanta finez  
(isiltasunaren poderioa)

Minez dihardute biztanleek urki ebakiak lez  
soin trenkatuenganako grinez  
(leiho oihanean barrena)

Pasiloa infinitorantz galtzen gurdia ortzemuga  
bailiren  
(karrika burdin sare)

Leiho bakoitzari paisaia zaio paisaia bera nenufare  
ustelen desioz ereina  
(urmaelaren mentura: ar-hesia)

Oroimenak hezurrezko kutxetan orain trinkoan  
aurkezten etorkizun ele beilegiz  
(denboraren beta)

Nekeza bere malenkonia manukorrari ihes egitea  
urte berri bizi berri deritzaio elurraren etorrerari  
(izen okerrez zamatua)

Soinak bakarrik jakin dezakete desio nabarren berri  
(negar egiten da farmalkoz)

Untzarenganako plazerra paradisu kadukatua

(farmalkoz elikatu ditu egunak)

Ilunbetak dirakite hostroei firfirak eragotziz alterego  
zimelduak pertxertan direino dilindan

(beti beste izatera kondenatuak)

Marmarren kolorearekiko dute logikamina garunen  
adierazbide akatsek eskeinitakoaren etoiaz

(kantuka)

Marrubizko mermelada elaien hobi  
kafesnearenganako

dantza erotikoan

(bihotzeraino odola bezala)

Espazioa xurxulez frinzatzen kutxakardetan  
Euskradak

amestuz

(posible da desesperoa nabigatzea)

Estonatua dantzu poterearen karkail teiauak  
(bere begien osin agorrengan)

Zanbrotsu deritzo kantu orori zer egin gaur zer egin  
sekula

(erreka umoen abenida zinkuru)

Baita.

U ne bere bere honetan  
edozein ekintza edozein liburutan gorde daiteke  
lagunak eskapo, guretzat trenik ez  
gure bihotzean, azken bihotza azken  
trenak eramane zuen iragan  
uherra pairatu beharra dute  
(Biziko istorioak ipui ankerrak dira ere)

Eta giltza batzu nonbait  
mahai gainean apika, liburu artean  
eskuen esperoan dautza  
ehundugeko ele eskegien erara  
ilunbetan oihal zuri dizdiratsu brilant  
haizeak eramana  
irudi akuarelatua lagun joanarena  
formak bere arrailduran badiraute  
ez da banaketa nekezik  
dizdira haize baleran  
gugan ernetzen da arrasto antza  
eta bizi hil negar irri badugu egiten  
lagun joanak bagaramatza.



---

*Patxi Rosoni*

Goizaldean gorde hintzen furingerarekin  
joanak apeta setatiak  
kolore guzti haien artean gorde  
hiria lainoak erditzen zuela  
aguztuarena egutegia, oroimenarena ordea  
ahioa balkoietan zintzilik  
goizaldeko koloretan joran  
eta desio hire gisa iheskor

Orduan huen partitzearen orena  
eta Aguztua begiak udazkenarenak  
dituena, esperoa beti duk berandu  
ispilu hautsi forma  
galdu, hemena hemen gabe  
lehertzen oldar  
gero eten pasioz finagoetan  
bihotzen adabaki oroitzapenez

Jaiotzaz kausa eginik  
aztarnez posibilitate erlojuaz  
torloju ustekabeen sortu arlasak  
jadanik gabe hi  
pasilo ilunetan barna non  
haizen Egon kaiolatua  
irudi ezabatu  
betiere desioaren hegiran

Goizalde garagardotuan ahioa  
frustrazioen salatari denean  
kausen bilaketa, paseoa argiak  
bentzutu hirian paseoa  
hin

---

Argazki zuri-beltzetan egunsentia eternal  
bilakatzean  
zer da izan edo izanen errainua  
buruaz beste egitera doazen baleen mentura  
ipar leinuen permadura  
akabatzean beste gu batzu gutuz  
largatuz plaza hutsean marearena  
dena tantai izenak  
konotazio ezezagunak, urrats lausoak  
zigilu hautsiak ohantze hutsak  
behelainotako soin galduak  
soin gabeko izenak.

---

Euriaren kolore herdoilez bustia karrika  
paseiante presatuen bihotzetan desio mina igerika  
telebista orratzen gerizan bizi ezdeusa etsita  
bide erdian zerbaiten seinale guardasola hautsita

arrats euri tanta laspel luzatzen den harila  
lo-hasman dirau jada sexoak itzalia  
hilartitz antzo hedatzen dira desirak  
ohantzen hutsen aztarnetan begira

negu, balkoi bustitan ernetzen da adarkera  
bedats bideak aldian gogorapen ezkelak  
paralisiaren kontrako permaduraz hausten dira  
aikerak

arroka beltzak bildu dituzte ibilerak

urtuak datoz ametsak, urtuak desio  
arratsak sexo furingeraren setio  
zanbrotsua karriken magaletan da oiestu  
negu, gorputzak dira ostendu.

---

Zuzi zurien gerizan ikusten zaitudanean  
nola elur pozoindua ekaitz erradiaktiboan  
ozono gabeko hitzak ixurtzen dituzu  
hitz ilunak irristatzen ezpain trenkatuetan ilun  
hilotz zaudelakotz

Zure zain erraldoietan milaka Heriotz igerika dira  
birika puskek bezala ur zingira uherretan  
zelatan dirau garai atomiko hauen izurrite xangratsu  
oro esperman  
larru jo aldi oro maitea usteltzen zatzaizkit  
laztanetan ustel  
hilotz zaudelakotz

Txua ortzemuga limea zerutzat bihotzean  
populatutako zomorroek  
begi izekia bezalako ideia itsasoan nabigatzen  
okel keru beltza darizula sistole bakoitzero diastole  
beltz  
hilotz zaudelakotz

Zuzi zurien gerizan ikusten zaitudanean  
garunak neurona ordez metraila zauriak ditu  
orro odoltsuak erortzen zaizkizula sinapsi bakoitzero  
hemisferio ezean baratz lohi lohi  
hilotz zaudelakotz

---

Hitz lime aire bat dabil  
amets hotzen oihartzun  
murmurio eremu batek garamatza  
preziatuki landatu izen iladak  
alkian atzipe ezinezko errealitateen seinale  
euri egin du gugan heriotz  
isil ipar gurdiak zeharkatzen  
gaituzte  
desioak, hantugabeko  
hitzak eta eskuak  
ezerezaren bide zidorrak urloan

Halere jo dezaket ekintzara  
zergatik zaigu orduan halabearrezko asesinatzea  
bi galdera zeinu larrujotzen ari ginela  
ostatu zaharrean non prostitutek gorpu mutuez  
lan egiten zuten

Orduan zer dira bi gorpu gehiago  
bi aizto gaizto

edozein izkinatik sor daiteke eraso  
baina sexoak lime datza izter gainean  
non nigandik dago gartzelako agintari?



---

Aingeruaren bihotz ustela. Argiak kausigabeko  
pasioak.

Odol ixurketa letaginetan.

Paradisu kadukatua. Paradisu kadukatuaren kiratsa.  
Errekaren

gaurako desira lizuna. Gauen desioa ibi bila.

Urruti perlak bezala urruti. Urratsak taupada  
gisa bizi-arrastoak. Odol ilargi ura.

Urtu ihes eta irristatu urratsak. Ibi exotikoa  
Gauren dirdir umeletan. Anpuluak diamante.

Anguluak arantza Gauren begitan. Hidrofobia.  
It was an uncertain adarkera.

Eskizofrenia ezkien elea. Odol jarioa ilargiari.  
Gizaki eskukadak. Hiru aldiz hiru: Heriotza.

Haltzak katarroarekin atijaka. Haltzak ur baso  
batetan murgiltzen. Haltz ebakiak.

Gauren arrama artean ontza. Iradukila untza.  
Hira eri eri hori.

Perlen taupada ur uherrak irensten. Sistole  
sistole. Diastole diastole. Denbora denbora  
errepikapena.

Zakil oihana sutan. Bihozbera oihan guarda odol-  
etan. Errukariaren patu urdina. Heriotza.

Aingeruaren bihotz ustela ontza. Katarroa bizia.  
Zakua.

---

Arratsa desioz jaztean  
zakil eta karminez  
ekia atertuz bat  
komun publikoetan  
ez dute maitasunik aitortzen elkar  
gauarenganako plazer huista soilik  
eta ez jakite hori  
HAY CUERPO / GORPUTZA BADA  
gizona batzutan  
gorpua beti

---

**E**nigmak daramatza Gauk  
enigma umelak, ezinezko desirak  
seta narru olioztatu antzo

enigmak daramatza Gauk  
behialako enigmak soin iheskorretan  
akiduran amaieratuak

enigmak daramatza Gauk  
betiko enigmak, betirakoak  
garaien hilzorian erotutakoak

enigmak daramatza Gauk  
enigma enigmari kateatuz  
bihotzari plastikozko bihotza uztartuz

enigmak daramatza Gauk  
enigma enigmak  
enigma hobiak.